

Unha tarde de botaduras

Redacción

Unha nova tempada iníciase para Os Galos no 2006.

A tarde do 29 de abril facíase en Pescadoira a "botadura". Ás catro da tarde, apurados porque a prensa non podía esperar que a marea subise un pouco máis, foron ao mar os dous botes polbeiros e o xeiteiro.

O bote polbeiro *Lagoas* foi construído no 1995 no asteleiro de Purro, na Banda do Río, e subvencionado pola Consellería de Pesca. Tras catro anos foi cedido pola Asociación As Lagoas á Asociación Os Galos, no verán do 2000, e con el inicia esta asociación a súa singradura.

O bote polbeiro *Rebello* foi construído na Escola Obradoiro A Aixola de Marín en 1993. Xa foi ao Encontro de Bres, na Bretaña francesa, e a Dournenez. Recentemente foi cedido aos Galos pola Asociación Cultural Dorna, da illa de Arousa (de aí o anagrama que loce na vela). Agradecemos a esta asociación que se teñan lembrado de nós... aquí ten familia e mimo: Fidel fai todo o posible por darllo pois el de polbeiros sabe, non en van ten publicado un libro, *O bote polbeiro de Bueu*, editado pola Consellería de Pesca. ¿Que mellores mans o poden coidar?



Benvido, *Rebello*, a Bueu.
¡Longa vida, polbeiros!



A súa historia para nós comeza cando se xuntaron os dous xemelgos.

E tamén foi botado ese día o xeiteiro.

O bote xeiteiro *Os Galos* é o primeiro feito por esta asociación, construído no asteleiro de Purro e subvencionado pola Consellería de Pesca. A botadura fíxose o 27 de abril do 2002.

E así foi, igual ca hoxe, pouco a pouco, tosta a tosta...

Alí esperaban os xemelgos, non puideron navegar ese día... outra vez será... a vida dos navegantes éche así: sempre ao capricho do vento.





Encontro en Bouzas 2006

Editorial

Dende Bueu, a Asociación de Amigos das Embarcacións Tradicionais Os Galos quere aproveitar a edición desta revista, para darlle as grazas á Asociación de Mariñeiros Artesanais e Deportivos San Miguel de Bouzas, polo bo trato que nos deron no II Encontro de Embarcacións Tradicionais de Bouzas, celebrado os días 30 de xuño e 1 e 2 de xullo do 2006.

A nosa Asociación participou con dous botes polbeiros, o *Rebello* e o *Lagoas*, e a pesar do neboeiro que atopamos entre Cangas e Bouzas e só coa axuda dun compás conseguimos chegar a porto. Podemos asegurarnos que mereceu moito a pena.

Déronse cita máis de 30 embarcacións: traíñas, dornas, botes polbeiros, gamelas, racús, catrais, carochos, galeóns, etc.

Esperamos contar con vós no noso Encontro, que se vai celebrar os días 18, 19 e 20 de agosto.

Sen máis, unha aperta de Os Galos.

